



BOSNA I HERCEGOVINA
VIJEĆE MINISTARA
Generalno tajništvo

Broj: 05-50-1-2136/10
Sarajevo, 20.8.2010. godine

PARLAMENTARNA SKUPŠTINA
BOSNE I HERCEGOVINE

- Zastupnički dom -

SARAJEVO

PREDMET: Odgovor na zastupničko pitanje – dostavlja se

Vijeće ministara Bosne i Hercegovine, na 130. sjednici održanoj 19.8.2010. godine, utvrdilo je Odgovor na zastupničko pitanje koje je postavio gosp. Slavko Jovičić, zastupnik u Zastupničkom domu Parlamentarne skupštine Bosne i Hercegovine.

U pravitku dostavljamo Odgovor uz molbu da isti uručite zastupniku.

S poštovanjem,



GENERALNI TAJNIK
Zvonimir Kutleša



BOSNA I HERCEGOVINA
VIJEĆE MINISTARA

Broj: 05-50-1-2136/10
Sarajevo, 19.8.2010. godine

Slavko Jovičić, poslanik u Predstavničkom domu Parlamentarne skupštine Bosne i Hercegovine, na 80. sjednici Predstavničkog doma održanoj 30. juna 2010. godine, postavio je Vijeću ministara Bosne i Hercegovine sljedeće poslaničko pitanje:

„Prije godinu i po dana ili godinu dana, tražio sam od Ministarstva pravde i dobio podršku Predstavničkog doma, da se izmijene 2-3 člana Krivičnog zakona gdje sam tražio da se za najteže oblike uključujući tu terorizam, dilanje droge, silovanje djece 9-7 godina, zatim trgovina bijelim robljem i oružjem, predvide maksimalne kazne, propisane našim zakonodavstvom. Šta se čekalo da se ugradi u zakonodavstvo i Krivični zakon svega tri, četiri člana i da se te maksimalne kazne, ja ne tražim da se one možda izriču ali one moraju biti predviđene u zakonodavstvu. Čega se mi plašimo? Koga se bojimo? Kakva ljudska prava za mafiju i lopove? Treba štititi ljudska prava čestitog naroda i građana ove zemlje.“

Na postavljeno pitanje, Vijeće ministara Bosne i Hercegovine je na 130. sjednici održanoj 19. 8. 2010. godine, utvrdilo sljedeći

ODGOVOR

Prepoznajući opasnost, a u cilju suprotstavljanja istoj, Bosna i Hercegovina je prilikom reforme krivičnog zakonodavstva u Krivičnom zakonu Bosne i Hercegovine od 2003. godine, propisala krivična djela protiv terorizma i organiziranog kriminala, trgovine ljudima, neovlašćeni promet oružjem i vojnom opremom kao i neovlašćeni promet opojnim drogama kao i postupak procesuiranja istih.

Navedenim zakonom za pojedine oblike krivičnih djela terorizma, organiziranog kriminala, neovlašćenog prometa oružjem i vojnom opremom i trgovine ljudima predviđena je kazna dugotrajnog zatvora u trajanju od 20-45 godina. Dakle prvim Krivičnim zakonom Bosne i Hercegovine predviđene su najstrožije kazne za kvalifikovene oblike navedenih krivičnih djela. Riječ je dakle o najtežoj krivičnoj sankciji u našem krivičnom zakonodavstvu.

Za krivično djelo „Neovlašćeni promet opojnim drogama“ Krivični zakon Bosne i Hercegovine od 2003. godine za pojedine oblike propisuje kaznu u određenim okvirima, određujući njenu donju i gornju granicu, odnosno posebni minimum od jedne i posebni maksimum od deset godina, čime se omogućava njena individualizacija, odnosno njeno prilagođavanje okolnostima svakog konkretnog slučaja. Takođe, za pojedine oblike određen je samo posebni minimum kazne zatvora, odnosno određena je samo donja granica, a kao gornja granica kazne uzima se opšti maksimum propisane kazne koji po Krivičnom zakonu Bosne i Hercegovine je dvadeset godina.

Takođe se napominje da krivična djela u kojima su žrtve djeca, propisana su u krivičnim zakononima entiteta i Brčko Distrikta i za ista predviđene stroge sankcije.

Međutim, pronalaženje odgovarajućeg oblika za suprotstavljanje ovim globalno negativnim pojavama predstavlja jedan od stalnih prioritarnih zadataka svake države, kao i odgovarajućih međunarodnih subjekata. Radi toga je Ministarstvo pravde Bosne i Hercegovine imenovalo Tim za praćenje i ocjenu primjene krivičnog zakonodavstva u Bosni i Hercegovini i pružanje preporuka za unaprijeđenje i djelotvornost njihove primjene, koji djeluje od 2003. godine, odnosno od reforme krivičnog zakonodavstva. Nadalje, Bosna i Hercegovina je 19.01.2006. godine potpisala Konvenciju Vijeća Evrope o sprečavanju terorizma (ETS 19), a istu ratifikovala 11.01.2008. godine, te Konvencija protiv trgovine ljudima ratifikovana je 2007. godine, a ista je stupila na snagu 2008. godine.

U skladu sa relevantnim međunarodnim standardima i obavezama, koje je ratifikovanjem odgovarajućih međunarodnih konvencija i potpisivanjem relevantnih međunarodnih ugovora preuzela Bosna i Hercegovina, Tim za praćenje i ocjenu primjene krivičnog zakonodavstva je (2009. godine) pripremio izmjene i dopune Krivičnog zakona Bosne i Hercegovine, a koje se između ostalog odnose i na krivična djela trgovine ljudima, terorizam i organizovani kriminal, neovlašćeni promet opojnim drogama i neovlašćeni promet oružjem i vojnom opremom. Izmjene Krivičnog zakona usvojene su u Parlamentarnoj skupštini Bosne i Hercegovine u februaru mjesecu 2010. godine („Sl. glasnik BiH“ broj 8/10).

- Izmjene člana 186. (Trgovina ljudima) su usklađene sa Konvencijom Vijeća Evrope o borbi protiv trgovine ljudima, sa Protokolom o sprječavanju trgovine ljudima i UN Konvencijom protiv transnacionalnog kriminala, te pooštrene kazne zbog načina izvršenja djela.

- Krivična djela koja se odnose na neovlašćeni promet oružjem i vojnom opremom usaglašena su sa Međunarodnom konvencijom o suzbijanju djela nuklearnog terorizma, te su pooštrene kazne za neke oblike ovih krivičnih djela.

- Novim izmjenama i dopunama krivično djelo „Terorizam“, upotpunjeno je propisivanjem novoinkriminiranih krivičnih djela koja se odnose na terorizam odnosno terorističke aktivnosti, te usklađeno sa članom 5. Konvencije Vijeća Evrope o sprječavanju terorizma (Varšava, 2005); kazne usklađene sa članom 5. Okvirne odluke Vijeća Evropske unije o borbi protiv terorizma; te vršeno usklađivanje sa III (trećom) preporukom FATF-a u vezi suzbijanja finansiranja terorizma. Uvođenje u Krivični zakon BiH novih članova (Vrbovanje radi terorističkih aktivnosti i Obuka za vršenje terorističkih aktivnosti) učinjeno je u skladu člana 6. Konvencije Vijeća Evrope o sprečavanju terorizma, a uvođenje novog člana „Organiziranje terorističke grupe“, učinjeno je u skladu sa Okvirnom odlukom Vijeća EU o borbi protiv terorizma. Takođe izvršeno je usklađivanje Krivičnog zakona Bosne i Hercegovine sa UN Konvencijom protiv transnacionalnog kriminala.

- Za krivično djelo „Neovlašćeni promet opojnim drogama“ u posljednjim izmjenama i dopunama Krivičnog zakona Bosne i Hercegovine pooštrene su kazne, pa je tako npr. posebni minimum kazne zatvora za pojedine oblike promijenjen sa tri na pet godina, dok je posebni maksimum od dvadeset godina bio propisan 2003. godine.

Dakle krivično zakonodavstvo Bosne i Hercegovine od 2003. godine ima propisane najstrožije kazne, odnosno kazne dugotrajnog zatvora za kvalifikovane oblike „teških“ krivičnih djela (terorizam, organizirani kriminal, trgovina ljudima i neovlašćeni promet oružjem i vojnom opremom). Posljednje izmjene i dopune Krivičnog zakona Bosne i Hercegovine imale su za cilj da pored ispunjavanja međunarodnih obaveza obezbjede adekvatan osnov i instrumente u borbi protiv terorizma i organiziranog kriminala u cilju poboljšanja nacionalne, regionalne i globalne sigurnosti.